

Gamboni fa vibrar lattas

In'egliada en siu niev album «Sut la pial» ha *Pascal Gamboni* gia purschiu ils davos meins cun publicar ina ni l'otra single. Ina da quellas, «Tschicago» ei tipica per l'ovra dil cantautur tuatschin. El ei buca sulet in talentau musicist ch'ei adina en moviment e prompts dad crear e cavigliar da niev ses tuns ch'el titulescha per: «Alpine Lo – Fi». Sias canzuns tuccan la noda dil temps. Tgi pomai havess buca getg cun gust duront ils meins vargai ad ina ni l'otra persuna: «Va toch a Tschicago». Igl album niev da Pascal Gamboni viva denton buca sulet dad ina ni l'otra melodia. «Sut la pial» perschuada entir ed entratg, ina ovra cumplexsiva scaffida completamein dil maun dil cantautur. Per gir ei culs plaids da Pascal Gamboni: «Cun las stiflas en nuegl schevas ir plattas che vibravan tuttas lattas.» Ei vibrescha veramein, sut la pial. (fmr/ac)

In'ovra che va sut la pial

Ils 15 d'avrel cumpara il niev album dil cantautur sursilvan Pascal Gamboni. «Sut la pial» ei dapli ch'in disc cumpact en tun, text e melodia. Il cantautur ha scaffiu ina ovra cumplexsiva che perschuada ina ga dapli e che va sut la pial.

Andreas Cadonau/FMR

Cun in'admirabla continuitad vegnan els, ils albums dil cantautur tuatschin, *Pascal Gamboni*. Siu dieschavel cumpara la fin dalla jamna e senumna: «Sut la pial». *Beni Vigne* scriva el text accumpigniont al niev album che Pascal Gamboni hagi gia dagitg anflau siu agen tun. Pascal Gamboni ha daveras anflau siu agen tun ed ei tuttina continuadamein en moviment. Adina vidlunder da sviluppar, adattar, cavigliar e crear da niev ses tuns. Ils tuns, las melodias ein la basa da sia creativad, il mund nua che Pascal Gamboni sesvolva bugen e nua ch'el ei dacasa.

Scaffiu ina ovra cumplexsiva

«Sut la pial» ei denton dapli ch'in album, igl ei ina ovra cumplexsiva che deriva completamein ord il maun dil cantautur. Pascal Gamboni ha creau il cover dal disc cumpact e dalla platta gronda, las graficas e fotografias dil cudisch culs texts per romontsch, tudestg ed engles. Registrau ha Pascal Gamboni sias canzuns a casa a Berna. Ils accumpignaments musicals per part arcunau via telefonin. «Ils tuns dil cello registrai cul handy plain a mi, els han in character special.» Las canzuns da Pascal Gamboni tuccan la noda dil temps, il sentiment da viver dad oz. Beni Vigne scriva da nungetgs maletgs poetics che ballontschan tras l'ovra citond in da quels maletgs. «Jeu femel il tun, e jeu paghel la tscheina cun ina canzun.» Da quels maletgs poetics enramai dalla ritmica melodiusa marca Gamboni pudess ins citar aunc biars. La FMR ha confruntau il cantautur tuatschin cun entginas da sias atgnas frasar.

* Il niev album da Pascal Gamboni cumpara ils 15 d'avrel e la nova platta vegn battegiada ils 22 d'avrel a caschun dil concert el Helsinki a Turitg. Ulteriurs datums da concert pon ins endriescher via la pagina pascalgamboni.com.

«Cun la ghitarra enta maun anflel jeu la pasch»

FMR. Nua enquera Pascal Gamboni la canzun? Sch'ei sto esser sin tetg ni ella sosa dalla gretta?

Pascal Gamboni. La canzun che cuntegn quella part da quei text ha in motiv specific. Ei dat caussas en mia veta che jeu stosel far e che jeu vi atgnamein buca far, ellas selain denton buca evitar. Da tschella vart sai jeu seser giu, prender la ghitara enta maun ed jeu anflel baul ni tard mia pasch. Jeu sun sedumendaus daco che anflel buca la medema pasch en autras situaziuns. Ei schai vi da mei d'anflar quella pasch.

Ed ella sosa dalla gretta gi Pascal Gamboni magari, va a Tschicago?

Absolut, jeu sedamondel magari daco ch'il negativ ha tonta pussonza, bia dapli pussonza ch'il positiv. Ti sas far biars compliments ad ina persuna e lu tuccas ina ga il falliu gnierv e quella suletta ga destruescha tut. La gretta ella sosa dalla gretta ha bia potenzial negativ e sche jeu dun memia bia pussonza a quella gretta fa ella a mi grev la veta ed era a miu contuorn.

Sesentas ti sin ina via da glatsch cun ils mauns en sac?

Na, jeu buca, il text da quella canzun sereferescha ad in da mes collegas. La historia ei vera, jeu vai ina foto da miu collega culs dents pitgai ora. El ei ius a casa suenter sortida culs mauns en sac ed ei curdaus sil glatsch. Jeu vai ponderau da duvrar la fotografia per miu cudisch da texts dil niev album.

Ei Pascal Gamboni era magari staunchels ed unfis?

Gie segir. La veta ha sias sfidas e jeu fetsch vess il tempo da quella veta. Buca jeu fetsch atgnamein quei tempo, el vegn plitost neu dalla societad. Ins sto spert furnir resultads e sche ti furneschas buca furneschas auters. Enzaco ein ins programmaus en quella veta quotidiana, quei stuncheltescha. Pli baul era la veta segir pli dira e pli stentusa, la glied veva denton dapli temps. Oz enconuschel strusch ina famiglia giuvna che resenta il mintgagi per easy. Na, tut discuoran da stress. Empau ha quei forse era da far cun las medias socialas. Enzaco less jeu sespruar da buca dar vinavon quei tempo a miu feigl.

Da l'otra vart fida Pascal Gamboni a tuts?

Jeu vai ina pulita fidonza el carstgaun e visavi allas persunas che jeu entaupel, mo era viers situaziuns dalla veta. Segir vai jeu adina giu ina certa naivitat. Jeu sun denton leds da tut quei che jeu sun seschus en e jeu less mantener quella fidonza en tutta cass. La fidonza ei atgnamein enzatgei che stat per sesez, enzatgei personal.

Jeu supponel che ti hages semiau dapli che 30 gis e 30 notgs da tiu niev album?

Segir definitiv, siemis han ina gronda forza, buca mo ils siemis dalla notg, mo era ils siemis dil mintgagi cu nus s'imaginein enzatgei. La fantasia ei ton impurtonta sco la savida. Ed ins sto fidar a domadus, alla savida ed alla fantasia. Quei sto ir in en l'auter. Sch'ins va en in niev liug, in liug nunenconuschent eis ei la fantasia che porscha in emprem maletg dil nunenconuschent e quella fantasia tila la finfinala.

Tema il giavel la musica pir che mai?

Quella construcziun vai jeu dad ina veglia canzun americana. E jeu vai quitaun che quei seigi ina coola, ina ferma construcziun. Gia visavi alla greta da Tschicago ni en grevs muments. Sche jeu sunel e seprofundeschel el mund dils tuns e fetsch in tec bogn en quels tuns, lu entscheivan il spert ed il tgierp a semuentar e quei che smacca untgescha.

E jeu drovel midada, biars levan la damaun cun il giavisch da midar enzatgei?

La pusseivladad da midar tut la damaun cu ins leva ei cheu. E lu vegn la gliesta da to do. E quella gliesta ei aschi ferma, e lu entscheivan ins cun ina caussa e lu l'otra e tuttenina ston ins aunc far quei e tschei. Vuler midar ei magari buc aschi sempel. Midadas vegnan per regla spontanamein e d'ordvart. Per quei plai a mi in'auter maletg, quel dad arver la porta e schar entrar il mund.

Cu ei Pascal Gamboni ius la davosa ga cun stiflas en nuegl?

(ri) Gia dagitg buca pli, jeu possedel gnac pli stiflas.

